

Aningaasaateqarfiup aningaasaataasa ilaannit procentit qassit ukiumut atugassiarineqarsinnaasanersut erseqqissaavigineqarsinnaaqullugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Naaja H. Nathanielsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersuisoq)

Aatsitassat Kalaallit Nunaanni nunap iluaniittut ukiuni aggersuni Kalaallit Nunaanni suliffissaqartitsinermit aamma Kalaallit Nunaata aningaasaqarneranut pingaaruteqartorujussuannngortussaasut tamatta neriuutigaarput. Tamannali suli pinngilaq, aamma aatsitassanut suliassaqarfimmi inatsisit tamaasa pillugit oqallikkusussuseqarnitta, aatsitassarsiornermi suliaqarnerup ineriartorneranut maannakkut pisumut naapertuutinnngitsumik ingerlanneqalinnginnissaa sianigissavarput.

Suliassaqarfimmut nunarsuarmi sumi tamaani nunani allani kukkunerit ilinniarfigalugit ingerlassinnaasatsinnut naalakkersuisuugama tulluusimaarutigaara. Tassanilu aamma ilaapput nunat aatsitassarsiornermik suliaqarnermit annertoorujussuarnik isertitaqaleriataarsimasut aamma tamatuma malitsigisaanik nunami tunisassiorneq piumanninnermut aningaasaqarnikkut malinnaasinnaajunnaarsimalluni. Taamaattoq isumaqarpunga pisussat ”piffissamik eqquilluartumik” ingerlattariaqarivut kiisalu suliassaqarfinni pisariaqartitsiviusut paasinarsivinneranni allannguuteqartitsisassasugut.

Aatsitassarsiornermi aningaasaateqarfik tassungalu siunertaasut pitsaasuupput. Siunissami kinguaassatsinnut ileqqaassaagut, aamma aningaasat maannakkorpiaq pisuussutinit killeqartunit pigisavut atuinnaassanngilagut. Peqatigisaanik paasisariaqarparput inuiaqatigiit aningaasaqarnerannut piffissamut ungasissumut tunngavissarititaasunut killissaliussat pitsanngorsassagutsigit aamma nammineerluta aatsitassarsiornermik suliaqarnermi aningaasaliinerni peqataasinnaassagutta, tamatumani aningaasaateqarnissaq pisariaqarmat, taakkualu suli piginngilavut. Tamannarpiaq pissutigalugu aatsitassarsiornermi aningaasaateqarfimmit aningaasat siunertanut taakkununnga atorneqarsinnaapput.

Isumaqaanngilanga siunnersuutigineqartutut aningaasaateqarfiup aningaasaataannit procentiliussa q aalajangersimasoq ukiut tamaasa atorneqarsinnaasoq aalajangersarneqarsinnaasoq.

Aningaasaateqarfimmiittussat qanoq amerlatigilissanersut naluarput, aamma assersuutigalugu

Nunaoil A/S-ip pisinnaatitsissummut atugassarititaasutut akiliunneqarluni suleqataaffigisaanik uuliamik nassaartoqarneranut atatillugu aningaasaliinissamut periarfissat suussanersut naluarput.

Aatsitassarsiornermi aningaasaateqarfik maannakkutut itsillugu, aningaasat aatsitassarsiornermik suliaqarnermi aningaasaliinernut matussutissatut, suliassaqaqarfinnut akisussaaffigilerlugit tiguneqartunut aningaasartuutitut matussutissatut aamma ataatsimoortumik tapiissutit annikillisinneqarneranni taarsiissutissatut atorsinnaavagut. Suliassaqaqarfiit killeqartut nassuiarneqarluarsimasullu tassani pineqarput.

Assersuutigalugu aalajangersaasoqaraluarpat aningaasaateqarfiup aningaasaataasa annerpaamik 20 %-ii imaluunniit 30 %-ii atorneqarsinnaasut, ataatsimoortumik tapiissutit annikillisinneqarnerannut taarsiissutissaqannginneq pissutigalugu aningaasanut inatsimmi aningaasartuutit, assersuutigalugu napparsimavinnut, atuarfinnut il.il., annikillisinneqartussanngornerannik tamanna kinguneqarsinnaavoq. Siunnersuut akuerineqassappat taamaalilluni, aatsitassarsiornermit isertitat aatsitassarsiornermi aningaasaateqarfimmut nakkartinneqartussaanerisa malitsigisaanik nunap karsiata ataatsimoortumik tapiissutit isertitai annikillineqarpata pisariaqassappat sipaarniuteqarnissaq piunassuseqarfigineqartariaqarpoq.

Tamatuma saniatigut aningaasaateqarfiup aningaasaataasa atorneqarnerat inatsisiliortunit nakkutigineqartussaavoq. Naalakkersuisut aningaasaateqarfiup aningaasaataasa atorneqarnerannik aningaasanut inatsimmi naatsorsuinissamut pisussaaffeqarput.

Isumaqanngilanga aningaasat qanoq amerlatigisut atorneqarsinnaanerannut tunngatillugu sukannernerusumik maleruagassiisariaqartugut, aamma isumaqarpunga inatsisiliortut nakkutiginninnerat Inatsisartut ukiut tamaasa aningaasanut inatsimmik suliarinninneranni pisartog, naammattoq. Taamaammat Inatsisartuni aamma Aningaasaqarnermut Akileraartarnermullu Ataatsimiititaliami suliat tamakku peqqissaartumik suliarineqartassapput.

Taamaattumik Naalakkersuisut inassutigissavaat siunnersuut itigartinneqassasoq.